



Evar Saar

KOTON JA TÜÜL

MEIL KOTON OM IMÄ JA KOTON OM PINI,
A TÜÜL OM MI ESÄ JA TÜÜL OM KA KASS.
ESÄ ÖDAGU TULÕ, KU KÄÜ LATSISAADÕ,
KASS TULÕ, KU KRÕBUSKIT TÄÜS PANDAS TASS.

IMÄ HOIT VÄIKUT VELLE JA PINI HOIT MINNU.
MI HOIAMI ÜTSTÕIST JA OLÕMI HÄÄ'.
A ESÄ TÕI EELÄ' ÜTE VILKUVA PALLI,
KASS MÕTSAST TÕI HIIRE, KIÄ PAKKU ES LÄÄ'.

KU KOLMAPÄIV ÄR OM, SÕS PÜHÄPÄIV TULÕ.
MA OODA, ET TULÕSSI' VANA JA TAAT.
KU ÄR NIMÄ' LÄÄVÄ', MA IKMA EI NAKKA',
USSÕ KÕRVAL TII KÕIGILÕ VAPRALT TADAAT.

